

四庫全書

集部

欽定四庫全書

弇州四部稿卷十四

明 王世貞 撰

詩部

五言古體七十六首

讀李獻吉何仲默徐昌穀三子詩

夔峽收英靈乾坤無真色擾擾操觚士各務徇所得
恍若襄城轍俱迷陰陵澤明興我高帝神武肆蕩滌七葉

開人文疇能承休德是時北地生草昧發超識手挽天
河流千秋鴻濛坼坐令景從輩齊聲諧其則矩步寧敢
渝狂者羞踐跡寧知龍變化夭矯不可即彼以蛙黷趨
胡然矜相測

其二

孝皇握鰲極萬宇揚休光藝士被天來大雅竟難方北
地既龍舉信陽遂鸞翔彼美在弱冠振馥馥時芳二華
削蓮花高掌媚太陽朝霞洛淑波因颼自文章二子琢

相就流趨互雌黃聽曲昧其名焉在譏頡頏寄言夸毗者冥趨良可傷

其三

伊昔吳都彥揮翰藻思披珊瑚間木難粉黛映參差豈
乏妖麗觀適志良以稀奕奕昌穀生中道起其微青天
盪胸表白日行鬚眉秋鵝搏羊角夏雨結虹霓泠泠松
泉響濯濯芙蓉姿當其所得意直與作者期為郎歎寂
寞短年悲奄遺匪但一世隘終焉造化疑貞也鄉之人

辦香夙所私廣陵悵云絕山水欣自知要令千歲後更
奏金蘭辭

二貞篇

庚戌敵傳城而軍又三年癸丑島寇起躡吳會
余於中外得二人焉越徐學晉任環蓋分死
矣而不死余識之間者濶焉即其人亡平生而
願為之執鞭者況與一日也

徐卿志恬穆闇然不自持雖復興文藻要非中所施躑

躅儔侶間咸顧私勝之營衛若千金一捐不復疑青天
見河嶽白日迴光儀所遇各自失焉能強攀躋汝往稽
剡濱高視浮雲馳余復白駒篇太息不成辭

其二

任侯神明守吏道將余師東風被蒿萊欣欣各自私力
欲洪波偃一葦恐難支俯窺龍蛇宅仰覩星辰移志士
輕喪元白刃蹈如歸能令行間伍戚若同根枝老父撫
國殤為侯捐不辭嫠婦泣其夫身今得所施精誠貫烈

日天聰竟能卑糾糾干城士厚祿擬何為

五子篇

濟南李攀龍

纖阿出溟渤皓魄中天發列宿豈不顯杳然精靈攝先
秦收正始六代時汨沒夫子揚嘉馨千載馭颶軌思排
入淵曠象成自昭晰至理中所賞胡然見時悅夫子乃
沉淪紛紛亦奄忽六合慘淡間微生借噓拂並嘯倚崆
峒蒼蒼極秋色上有三危露芝菌芬樛結攀英啜其滋

虹霞動靈宅却笑羨門者長生等澌沫

吳興徐中行

藹藹洵吉士產秀自天目泠泠穆風披青陽振膏馥調
氣翫時人幽懷被商曲客從東方來貽君以迷穀含吐
茲未酬宛然中心篤柔條沃嘉霖雖罷中所欲良璞困
鑢錯連城謝其琢逝將因君御並起雙鴻鵠

南海梁有譽

大溟湛珊瑚陸離灼叢條龍伯何神舉弱緯連六鰲之

子為國經含英奉清朝汎瀾先民蘊眷念首陽椒杜權
形俱歛匪戰理自超賤或重千鈞貴則等逝飈羅浮七
十二一一摩層霄玉笈子長往金徽子罷操

武昌吳國倫

高旻漏元氣瀉作黃河流排蕩識其支焉覩崑崙丘武
昌蘊夙解獨往恣神搜亥步亦何窮原問非所讐仰窺
太乙精冷然注天湫調浪鼓青陽餘風映素秋下士俱
大笑呶訾不能休寧知帝弄臣坐令鞭九州

廣陵宗臣

伊人璫璣彥履盛無嬰躬豈鮮盈門軌匪其徑寸衷為
壽不在年千秋以為終斯道苟不蕪排衛當誰功沉淪
知夜光鴻鵠高天風枉矢射彭城逸勁飲石梁誰謂漢
哉廣裏錐航扶桑竦身太華顛羣途杳茫茫

後五子篇

南昌余曰德

德甫負耿介往往排羣好楚咻非所顧齊風乃同調續

緡媚沈川夜光為之耀累柯刈宿楚山骨露幽峭有嚮
必當心尋源乃深造是時西曹彥苦李在周道所以獲
自全闕天舒清嘯

蒲圻魏裳

魏生捐者流勃窣名理窟物好都不營而以求真悅眄
睽當世人迷津要余筏片語識其端雄思坐超發莽蒼
大鹵間一坏何碑兀揮手出嵩喬青天距如髮安得凌
風翰送子排真闕

歙郡汪道昆

伯玉人間人忽往在千古矯矯先秦則恥為東京伍匠
郢斤成風所至自規矩一汰塵調非耳觀衆稍沮論交
豈必面飛書示肝腑四十開闢疆黃金絰其組吾道何
必然諸子氣亦吐

蜀郡張佳胤

才士地不乏岷峨所鍾英之子試為令快若刃發硎循
吏在中牟亦足垂其名改途導詞苑方駕結齊盟雅鄭

紛奏前至耳選其正白雪發高倡下流皆令聲安得凌
風翰長翺於玉京

新蔡張九一

助甫秉天秀弱齡藻辭鋒一出宰巖邑百吏趣下風入
佐天子銓摺紳所景從折節禮楚纍羣詠藉相攻攬轡
西南紀清商變炎空下蔡出傾城皎若青芙蓉寧為衆
人妬不為衆人工

廣五子篇

崑山俞允文

俞生不偶世削跡混屯夷時治避大質天籟竅幽機懷
壁非所愆含英竟焉輝晨炊不逮暮室人交謫譏玄商
吹衡宇霜霰無停飛悠然眉間色忽映西山薇婁水逝
洋洋偕子以樂饑

魏郡盧柟

盧生富結撰揚馬有遺則及乎為詩歌雅好在李白春
風揚波瀾浩渺靡所極仰見朝霞媚俯見水五色蛾眉

一成妬雄飛鍛其翮朝奏獄中書夕為坐上客妻子不
殫人長歌下震澤

濮陽李先芳

伯承俠者雄摛詞何爾雅芙蓉秀濁水清芬自堪把往
知在傾蓋攜手即中野四顧邈無儔幽懷浩傾寫行行
愉江宰悵悵誰與解訟庭涼颼生商歌和彌寡有志迫
未竟強為時人下

孝豐吳維嶽

峻伯青雲姿飾玉振鳴步二十遊京邑興文粲烟霧一
出時貴傾匪在戚與故此道行世間識者如其素豈不
諧衆歡要覩中心慕紓懷歷下生改轍遵廣路雅鄭辨
已勤况乃垂韶濩

南海歐大任

歐生最晚交其識乃先曙旁獵六代言鬱為西京路五
十而釋褐微官歷揚豫一為邑文學再典州掌故游宦
豈必達深衷托豪素掩抑再三歎少小為名悞宛宛照

影姝沾沾不虞妬

續五子篇

陽曲王道行

明輔瑚璉姿清芬溢其齒二十典方州三十賜金紫雖
負循吏聲雅非中所喜魔來付禪觀戰勝歸名理餘事
乃及詩亦方開元軌貽君山林日朗曠自此始

魏郡石星

石生昔抗章攀天動星辰芬芳一世間誰能不見親論

交須論晚辨材須辨真肺腑一相披灼然世無人未央
鬱造霄賴子表嶙峋慨焉念漳流淪沒連城珍

嶺南黎民表

昔余客招提黃鵠為徘徊五子臨乖隔黎生翩然來方
響入絲桐所奏靡不諧濩落金馬門驪龍狎其頰非無
蛾眉妬隱酒不見猜和光同其塵老氏我所推

豫章朱多燦

驥足有八荒惜哉櫪中老王孫負奇氣少即成潦倒幸

無詩書禁千古恣搜討窘迴長沙袖迂逐淮南寶俯仰
宇宙間局如束濕草富貴非所求令名良自保

虞邑趙用賢

子師名家雋出入珠玉府所獲豈不贏而以求真與將
無一時屈所伸在千古寸鐵寧不頑連城繇茲睹入夜
必自光勗子無輕吐秦人已睥睨荆人猶齟齬

四十詠有序

庚戌之春予以病休曹假伏枕不憚憶數鄉哲

彬彬多鉅公異人龍質鳳章雲蒸霞爛雖潛見
異則托就大小然亦盛矣因紬繹所聞自我明始高岱迄
今共成四十章匪辭挂漏之慚聊見仰止之私耳

高太史啟

李廸負神啟駿發自名郡縱毫動天籟調篇黼皇運邁
世無永晷後身有嘉問璉琢藉未工楚氓悲其瑾

黃給事鉞

叔揚踐華省食貧無異操奮為墨衰舉匪以弓旌招借

著畫勤王湛淵報久要形泯神自王松柏蒼然喬

王逸人賓

逸人挫榮者浮沈竟闐闐折姚見玄理訪戴襲竒秘既
殊紫芝宦復異鹿門娶玄德誠可師母乃為孝累

姚少師廣孝

少師遁儒跡握筌理玄符業由殺機發教以神用敷赫
赫不遷庭侑公配宏謨胡然踏迷復緇衣即永途

楊尚書翥

楊公歸然老故人握璫璣遂令武昌戌陽春迴赭衣曳
裾時豹隱推轂乃龍飛優游桑梓間樹惇以全歸

陳僖敏鑑

僖敏長者度時展經綸才白馬出秦關虬髯何壯哉河
隴既以奠尸祝至今開豈知衿裾士威譽揚九垓

陳僉事祚

退翁昔持憲驄馬何翩翩先疏已致身敢望天子顏臣
祚誠無狀百折寧不前雖或謝幾哲終焉保貞堅

俞司寇士悅

太保稟剛峭面色凌壁鐵所至如子元網絡甚張設赭
衣忽被體永謝孤卿列道遇金齒公後車亦齊轍

徐武功有貞

武功蘊宏畧希世邁奇表挾日肇封祚治水贊熙皞大
勛古難恃令名當自保迢迢南中雲惻惻羨飛鳥

劉文恭鉉

文恭達節者畏榮恒怒如羣謀狗天步獨行竟何濡食

報遺後人位絀永令譽乃知癯然叟可以托遺孤

張提學和

穆也非不佳節之難為弟當其射策時英聲動宸廡
輪見老手藻鑑存清視造物亦忌人榮名淪散位

韓襄毅雍

襄毅秀弱冠揚策振天路中躋迺益習晚柄諧所遇威
伸七縱畧功成五月渡壯心寄隱跡坐惜齒齡暮

葉文莊盛

文莊瑣垣彥直志濟遐矚邊土仗雄望嶺越借寧隩日
晏坐繁省歸來奏清曲古道終有諧今焉歎時服

魚開封侃

魚侯治雄都貪吏逆洗跡中歲賦歸歟妻子猶萊色雖
乖清泌樂終守西山則人事良可悲天心竟焉極

劉叅政昌

太中少穎脫往往出新詣跌宕郎署間清芬藹然萃五
嶺窮履跡三蒼辨鼎識乃知忌者心翻然為名計

孔侍郎鏞

司空守荒郡，簞路啟山林。
萬面若猿猱，片言剖其心。
簫鼓薦叢祠，生存多饗歆。
是以臨沒候，列宿表精祲。

吳文定寬

文定秉謙退，冥志在墳典。
所樹苟先衆，寧辭步趨蹇。
朝回對花竹，落日照開卷。
此意今所難，吁嗟德音鮮。

王文恪鏊

文恪辭家流，廣庭振華轂。
帝時絀師臣，遙跡肇枚卜。
豎

人窘犬步怒焉歎一木歸卧洞庭野世往譽恒馥

陸太常鈇 張脩撰泰

二君青雲彥攄辭復同調鈇也千仞壁蒼翠絕奔峭泰
如殮芝露九咽動靈竅黼黻未章施長筭屈短造

先祖司馬諱

昔我先司馬歆歷徧遐荒至今訟庭樹往往比甘棠藹
如三冬日凜若九秋霜千載循吏編庶以紹龔黃

李少卿應禎

少卿善書法強起侍中秘詔為譯經藏卿也獨奏記吾道有九經上其章留意百折終不回榮名淪末位

陸太宰完

陸公秉戎樞受脤事橫征中流蕩日月殷波血鯢鯨歸來宴父老故里高車迎沒齒甘巨僂焉能終令名

楊儀部循吉

儀部志狂者墳丘事冥討三十而掛冠握機豈不早胡哉昧遠算一出為小草攬其遺文辭悼彼耄昏天

毛文簡澄

毛公踐華顯秉性乃恬易杜門飲醇酒口不談世事一
遇鼎革間鏗然踐堅議天怒百不回秋風有歸計

顧太保鼎臣

文康自講筵磊落真主識鎖鑰見深寄版築遺芬澤坐
客悚莫干虬鬚紫如磔少選出新聲彷彿安昌席

徐迪功禎卿

昌穀振奇士玄覽意何卓芙蓉秀濁水蒼隼擊寥廓調

古鮮同驅名高遠時作詎為坎軻恨短年亦予樂

魏恭簡校

魏公東淵著雅志慕古昔時衍洙水流力斷曹溪脉
蒼牖稍已垂簪纓遂中辟三絕蒼頡編往往明心畫

朱尚書希周

尚書握留銓五十遂懸車優游更三紀塊然返其初
眉宇鵠春陽和風被里閭良璞猶未雕見者稱璫璆

周恭肅用

恭肅故長者所歷多恬穆及乎握臺網霜天見雕鶚藻
鑑雖已晚彈冠衆相樂車門日夜開無金可稱卻

沈居士周

沈生逸者流夙尚丘壑責緬懷狗所好十日一山水游
戲無全目縱橫得真理平生所餘事耿耿乃在此

祝京兆允明

希哲寄聲酒詼諧放情素翰墨人盡研巧者由機悟游
龍宛霞浦芙蕖發朝露世上亦何有悲此邯鄲步

方太常鵬

庶子負書淫終歲勤述作謝病再起官將因傳禮樂鶴
禁屣若遺清卿秩仍削悠悠見素心所享不辭薄

文待詔徵明

文翁負耿介至巧亦天性髫年卻金賻中歲辭藩聘既
三鄭氏絕仍齒伏生境遙裔播休華千秋猶輝映

周寺丞鳳鳴

大理世其官能文法無害執憲昌言朝如何與譴會音

容自矩律筴筭幾著蔡積儉乃起家藥伯慚其汰

朱中丞紉

中丞匪躬者仗鉞事專征瘴海肅鯨波舟航偃不驚渙
羣嬰衆鑠披已乃孤誠安能對獄吏慨焉捐此生

陸太常祭

浚明經國才所遜在勇沈雖復豪文戰而乃非素心鳴
鳳吐朝陽漸鴻遯中林幽懷故有托寧為邁荒淫

王選部穀祥

祿之當佐銓晶晶若冰玉歸來三十載歲月天所屬辟
書再及門澹若雲過目何必寫匡山胸中有巖谷

先御史大夫諱

外侮中不競踈者亦暫親矯矯先大夫一身當百身白
日照披肝噫氣成星辰痛無九京轍為言誅佞臣

王太學寵

履吉藉甚年灼乎舜華敷非酒使人酣況乃薦醍醐玉
樹困霜風良駒蹶脩途其蹟猶尚新其人骨久枯

黃徵君省曾

勉之富三餘垂言亦驚衆收名良已博負大不易用公
車一報罷遂甘醯鷄甕有子能象賢居然冢枯重

三楊詩

三楊者廿年中人也始射洪至太僕次富平為
御史最後容城武部矣咸不自量批亢拂堅罹
大譴何言也予竊覲其志哀之妄為三章同日
之義罪亦甘矣

癸丑夏時誤傳
容城君已逝

矯矯射洪君累資奉卿列勛稱或後人所治多惠轍金
紫外相縻生平一短褐權貂千天紀况挾左道蠶內禪
移襁褓社稷絲係絕羣公滿臺省往往比稷卨相顧但
搔首彼覩恒結舌君也義所憤草奏遂身訣神僊歸杳
茫藥石吐痼孽秦王與漢武遠鑒乃昭晰岐嶷固齊聖
萬幾恐未哲臣某甘礎益為國謀豈拙是時閭闔開宿
衛浴金鐵一傳常侍詔班行膽為裂青天朱雲檻碧日
萑弘血皇靈終動變魑魍亦歸滅至今穆清表帝座烟

長徹國事廿一身微誠竟何雪萬古涪江流劒嶺更截
嶸

其二

天地氣不滅今古遞流行巖巖富平君所得何太贏朝
籍未云久浩然厭承明絀志終老親食力乃躬耕貸粟
耻監河獨行異於陵我我獬豸冠一出狐豕驚兩分既
以展慷慨示平生訾疊探亂源力欲奸諛清屈指及四
五天怒不為恒九關下虎豹白日紛雷霆沈冥狴犴間

血肉浩縱橫十載無生晷萬死有餘誠荷校誦遺編庶
幾演周經茹甘豈以蓼就燠豈以冰誠知非身計心各
有重輕終荷帝垂聆役服等齊氓未永鼓腹游溘哉大
命傾此疏憶昨傳夜燈盡熒熒片紙或隻言若引九鼎
絙歸骨二華顛咸秦遍精靈

其三

躑躅廣莫間乾坤迫遲暮一接容城生遂令豁衷素往
者大難集邊塵窅天步蠶藩托援師皇誠柰深顧陰謀

重借寇耗我黔首賦謂邁互市歡弭其來侵路生也叫
閭闔畫沙請前箸堂堂如中國威威僅奸豎障尉適窮
邊年命不反悟乾威歛豎魄伏機乃大露命爾尚書郎
憂天漸成痼賜環主恩深請劔臣節固安危托將相腹
心橫巨蠹豈惟臣私憤萬口脅莫吐吏議既以深龍鱗
遂終忤慘淡濱海臣傳章復尋訃夕卧五四起明河望
東注頗聞草奏時業已為棺具元造竟何心茫茫一身
付所憂在國謀敵志諧舉措大澤淪蕪城瀾濤誰能募

偶書

鬱鬱桓桓墓白石何嶙峋惜哉三年力不能葬其身空
見撫琴士千載悲斯人

其二

黃雀擬螳螂下乃見彈射古來奸雄輩頗復遇其敵禍
敗狗所常勝者亦焉得

其三

邯鄲倡家女巧笑倩紅粧如無好顏色何以結不忘借

謂鮮所私何以得為倡

其四

長安狹邪客片語黃金千歸來但壁立四座稱豪賢稱者漸不識零落一身偏

其五

賈客狎風波黃金如山積人云貴明珠遂適海外國垂老鯨鯢身嗚呼竟何惜

將赴計偕呈同志

神都亘天北長河萬里開文星起吳會燭煜凌金臺朔
氣日夜深我行何壯哉君看孤舟去應驅駟馬來丈夫
但有足跡當遍九垓長揖辭故知肯為兒女懷

秋風

燕臺廩秋速永夜何蕭蕭高樹迴天風木杪溢洪濤初
至驚客夢忽來侵薄裯紈扇委故篋園英悴新朝烈炎
寧久固時至詎能逃吾將感世運行矣任所遭

除夜有感

此歲盡此夕此夕不再得大化何心去流光長自惜明日更明年明年重可憐花迷上林月夢落楚江烟相逢半游子陸沉金門裏朝典蘇季裘暮乞侏儒米千歲遞相送那能屢禁此

齋日作

茲辰方致齋况乃停推剖無事卧起遲日色在楊柳瓢壺盈豆粥煮茗用當酒諸君勿復言予禱亦已久

阻風下邳南待發有作

積風見日色久客見容顏翳翳昏黃交桑柘自生烟
惝恍一飛鳧乃是天際帆條馬過舷際欲挽不得言去者
日以去還者何時還

初拜使命抵家作

去家未十載結綬始言還惝恍夢寤間歷歷陌與阡耆
老揖且疑安識衆少年昔別猶髫髻今來室家完酒炙
爭慰勞陸博夜喧闐解帶著庭樹改席臨後軒離合誠
欲輕焉覩鬢及前

其二

乍出城東門秋禾鬱離離池塘漸為窻鷄犬亦聲微冠
者五六人不能具裳衣廬舍雖如昨亦復少光輝借問
何所因何以不成辭揺手長吏嗔惻愴涕交頤

其三

道逢皤然叟罄折前揖之叟顧何官宦姓名爾為誰光
彩溢閭里於職竟焉宜罄折前謝叟汗洽失陳辭天子
衡明聖叵測異威施小臣實微賤三尺安能持

其四

出戶明星薄隱隱見蒼黃稻禾集若雲杵臼搗為霜東
隣呼看社西隣饋酒漿鷄犬隨亦喧況乃童稚行挂我
新時冠着我舊時裳居然一田父豈必言廟廊

天津道中述懷

宛然天津樹一夜風吹索停耳多哀音寓目寡鮮澤况
乃淹道途脉焉芳華鑠浩浩四序交天地為常格憂歡
生殊態豈必當搖落阮公廻車慟慮生誠不薄陶令愛

沉酣中懷何能度

德州渡口

月細僅如鉤疑升復疑沒美人沙間坐白露濕羅襪低
頭怨去船舉頭愁殘月

朱象玄太史冊封楚藩云將取道南游太嶽詩以
送之

於皇展親睦宗子介樊襄玉圭黃金冊暉暉出尚方伊
余同門友洵美清而揚詔其輟史幄爾往欽哉將天都

闕閭闔九奏何鏘鏘蓮燭際宸暉星裾牽御芳前呼薄
崇椒後餞塞津橋白茅仍擁節班馬重橫鐮雪裏薊門
樹花前漢江橈漢江一千里方城暮烟紫鳴鉦蕩魚龍
解纜採蘭芷葦路捧霓旌從价躡珠履帝命尊若天王
封固於砥此時雍堤柳柔條盡抽綠上客金馬姿小兒
銅鞮曲山問諸葛龍門訪龐公鹿羊碑摩絕翠蛟渚泛
明玉壯游重茫然弭節太和巔揮手弄日月盪胸拂雲
烟中有兩僊童跪捧琅函編竒字不可識閱之二千年

今遇蓬萊客始宣至人傳歸上紫皇壽珥筆長周旋

見邊庭人談壬子三月事有述

戌從上谷來瘡痍半侵面對酒不能酌未語淚珠濺借
問何為者告我三月戰妖氛祁連發雜部呼衍徧令速
颼雨集臺荒烽火眩卒然遇山頭狐兔竄散漫我師不
盈千敵衆已號萬拓弓鳴霹靂走馬威飛電層冰煜戈
甲烏雲罩髮辮中間兩旗出倏忽天宇變况乃積威後
吏士總灰汗低頭念父母黃泉去幾線亡矣存不知人

耶鬼難辨桓桓時將軍環甲流英盼飲水賈逸勇解鞍
示餘筭堅重麾下當騰驤諸孫先赴敵均戴天喪元等
飄霰屢衝亡移足再接莫逃眴批擣肉郊原喧呼濤江漢
日莫圍未解炊烟出胸咽白馬飛護軍朱纓光燦燦斬
其前却騎賞彼兵鋒冠長空雙眸疾宛轉墮一箭咋指
大衆遁橫戈銳行殿橐駝牆外收野老溝中看痛定還
神魂追思更搖暝倘不天意在人盡烏鳶飢嗚呼一千
卒將軍實樞幹昨者捷書聞懽溢未央殿論功非常格

行賞絕淹旦南金囊蹠方蜀錦獸袍茜捧出皆動色光
輝耀馳傳元戎何驕盈聞之怒椎案手自推轂臣不如
偏裨賤十萬羽林兒膂力豈不健節制紛下施功成違
亦譴頭顱完萬死肝膽折一見居平慕廉吏募士黃金
散家有鄆杜田為壽前致獻所丐假威嚴那能望恩眷
不然卻敵身充庖若鳬鴈妻子詢未平部曲私相唁死
生已獨當寵辱他人擅東鄰酒家胡洛陽業商販甲冑
為何物勛名首騰薦人奴豈衛青通侯及韓嫣紛紛貂

尾續汲汲羊胃爛天子實明聖塗肝亦何惋所慮緩急
膺諸邊士心玩請劍天茫茫王室勿多難

薄暮發古城即所見志懷

一水天末明餘霞亂相射錯落披金膏噴流萬瑟瑟長
嘯招天風為我馭海席吳越指掌間黃花正秋色

行淮揚境汎覽社即事有作

湖波二百里元氣何茫茫天隨一線盡日起萬鬣張無
論南北風但見來往檣炯若青銅鏡掩映美人粧驚鷗

散明玉唼藕奪冰霜纖鱗一入手大嚼無餘觴冥見漁
火微靜聞稻禾香榜人前後歌語語子夜長人生劇可
樂何如近故鄉

十五夜泊彭城無月呼酒既醉信口而歌成此一章

所至無可飲欲邀中天月此夜桂樹寒姮娥蔽瑤闕玉
兔寂無春焉能天香發羣山青不斷一一隨淪沒手酌
自為歡長歌入窈忽安得掃妖氛鞭鯨度溟渤

天子詔職方張君子畏發齊兵平吳世貞吳人也
恨不得從一卒之列慨然歌五言長篇為贈

太空下攬槍化作千長鯨血吹海波立高天鬪崢嶸白
骨為丘山草木殺氣腥竭來佳艷地倏忽無所憑昨夜
明光宮君王議南征青齊良家子少小學縱橫白馬雕
螭弧銀鎗鬘胡纓匣中報讐劍得施懼自鳴橫流一鼓
譟黃河西北行能使赤日暗又令秋雲明不待發遠縣
臨淄人盡兵立看徒步間往往足公卿此時羽檄使矯


若雙千城乘傳張廷尉結襪王先生慷慨大風歌髮指
上填膺輕颺蕩雄心散入鼓角聲長鯨肉萬類終就鼎
俎烹舉頭笑真宰此輩竟何成惟應千年後獨書公等
名

讀梁公實詩有感

羅浮七十峯峯峯白雲住鰲颶海上來吹君向何處咳
唾落滄波遂成珊瑚樹欲作萬古色精英莽迴注摩娑
三歎言胡人不可遇

為彭州李徵君題會泉隱居

帝女勺銀漢瀉之岷峨間恍如一匹練飛界萬仞顛喧
奔虬龍嘯錯落瓊珠圓蜀人有李意學道殊精堅澆田
出白壁煉藥返紅顏何如飲神漢一住三千年



弇州四部稿卷十四

欽定四庫全書

集部

弇州四部稿卷十五

詳校官侍讀學士

臣陸伯規

中書_臣劉源溥覆勘

總校官原任中允王燕緒

校對官檢討_臣應應

謄錄監生_臣金拔

欽定四庫全書

弇州四部稿卷十五

明 王世貞 撰

詩部

五言古體五十九首

自燕中來者云斥逐輕薄朝士殆盡賦此解嘲

叱羿射狂日令媧補漏天千秋絕至技萬象橫妖躔問
我今何適吞聲滯窮邊問我何名姓碧玉琬琰鐫上帝

有弄臣戲博太山巔爭道誤一叱中讒墮風烟臨岐酌
沆瀣渴吻三十年月為琉璃盈星是黃金錢小兒東方
語鄉里驚不傳一字猶未識調笑司馬遷左氏盲老公
齷齪諸侯編挿天昭王臺至今在幽燕挾策往從之飛
翰獨翩翩魚服悞白龍豫且嬉廣淵一為湛朱網蛙黷
遂來牽驤首叫閭闔七萃俱茫然西入鸛鳩司慘淡白
雲篇何來四五人自稱俱謫僊其魁廣成子安期或偓
佺恂恍識其故昔者上帝前托陪瑤池飲歸共青輜輶

悟來忽大笑靈氣生五咽豈無兇離樂不得誇喧闐高
歌灞陵畔落日珊瑚鞭酒間呼白雪片片下瓊筵四海
水四勺五嶽五石拳且移華陽席改就糟丘眠一言闕
突兀萬目紛睒睒猛虎欲噬人不肯避豪賢腐鼠豈入
眼鷓鴣遇鷹鷂執戟鬚垂白巧宦笑其玄舉世逐狂且
南威故不妍頭顱無凡骨不愛挿貂蟬君自吹胡管我
自挾朱絃請君勿相忌君亦勿見憐但令放之去歸種
南山田野夫事真宰肯受時人權

醉贈故張職方重

匈奴十萬騎席捲燕山紅羽檄天下兵誰能辨英雄張
侯尚書郎倜儻國士風還他惠文冠佩我烏號弓匣中
吳鉤色煜煜青芙蓉三晉俠少年結束花驪驄一呼萬
衆合片語千金空還遷縉雲氏上計葡萄宮願指金吾
帥長揖司馬公畫地作黃河波濤起其中掛冠神武外
買田平陵東匕首鑄腰鐮吹憤氣成虹我本落魄人衣
帶紕其躬相攜一斗酒醉眼天朦朧擲君牛角書莫令

我輩逢請看長安道功名誰得終

過東阿懷古

步出齊東門遙遙飛車塏荒城闕睥睨外與頽垣會
榛蕪侵周道鳥雀驕有賴佇想英王風凜焉今安在千秋
阿大夫當時偶一敗茫茫長安日歸歟欲誰待

方子出示吳徐二子詩有感

二子吾詩南蒼茫散星斗招提終天淚萬象俱頽首

丙辰

春別余報
國寺中

如何雙驪珠熒熒落君手虬虎攫春冥風雷

走晴畫鬚眉悅相值談笑若在口薄譴吾人事榮名定
誰久匡廬武夷間真宰亦知否

叅議范君視事三日即出泰安過萊海還齋表而
北賦此贈之

范叔倜儻士南州多令聲忽如阮陳留騎驢向東平飲
酒僅三日翩然朝玉京昨聞太嶽來呼吸通神明題詩
丈人石萬象俱崢嶸東遊觀萊海海水殊淺清中有貫
月槎乘之汎蓬瀛天門為君闢河鼓扶道迎莫采白榆

錢人間失歲星水擊九萬里倘其念南溟尺鷃在衡藩
栖栖竟何營

諸方警報叢至用成孤憤投寄翁朱二公

淮海驚鱗踊江介衡波流會稽棲組練檣李集星旂鵲
興晉陽甲蝟起牂牁讐閩嶺無完土燕秦鮮宿饌誰謂
八絃廣東我如一坏戢戢趨亨士寥寥傾否猷結髮辭
家食舉宗被恩休陳列郎署間剖符東海陬揣分雖不
任匪職難為謀慨矣扶風嘯越石不夢周率爾千乘答

仲尼或哂由況乃我嚴君受寄在戎輒曾是北顧紆緬
懷中制憂久戍賦清人零雨東山道迴光冀日月返駕
賁林丘請用微薄躬上為君父酬七尺終歸盡寸心誰
與投進虞處堂燕退愧營巢鳩投分報公父裁書謝阿
游方駕騁天衢執鞭如可求母使跼足鳴重貽伯樂羞
過故陸虞部第有感

昔余奉使還兩飲虞部家虞部三郎君各各關豪奢初
筵行大白邀我醉梅花此梅十畝陰老龍吐嵯岬酒酣

吹鐵笛萬玉亂橫斜落月參黃昏笑上白鼻騮再醉牡
丹亭春光亦繁華斗大潁金盤朵朵壓紅紗疑將并州
刀碎裁洞庭霞珊瑚續夜照不惜鞭日車此樂難數得
往往逢人誇轉盼不十年陵谷忽遷淪牡丹割食馬老
梅斧為新東風依舊吹惟見萊甲春額是虞部額人非
虞部人中有刁家奴濁氣搏秋旻虞部昔肺腑況乃手
足親一為并吞念百巧日夜新二子散他州長者委黃
塵問主既已非此梅安足論歸來見兒豎驕駭不能馴

撫心長太息惻愴涕沾巾

夏日村居有述

江村養余懶頗不病幽獨維時仲夏初長天氣清淑野
人太無事自起為約束凌晨盥嗽畢叩齒三十六始澆
庭中花次洗屋後竹薦麥欣及新分葵味餘馥弄筆南
牕下醉瀟憑淋漓金石四五編騷雅一再讀吸澗煮茗
旗松聲騰波綠小啜清飈來塵襟淨於沐課童抄酒經
進客命碁局樹影俄已圓厨人報藜熟飯罷何所道出

門信其足扶耒古隴傍垂綸清溪曲維東有蘭若經藏
可遊目隨意手一編無煩證耆宿斜陽語來下炊烟布
平陸及歸尚未暝蓬湯芬初沐涼髮風衡門明蟾破茅
屋有友二三人非雅亦不俗勸酬久已荒七筯肆所欲
醺傾若下酒杭汎宜城粥恍惚塵外語星河莽相屬瑜
枕竹方牀湘文簾如玉中有騰騰鄉容吾便便腹緬懷
康莊士聲勢迫驅逐紅塵沾襪襪白汗脂炙轂所得仲
孰多百年亦良促寄言斧斤者吾甘不才木

王生近詩爽然有天際真人想乃父沂州君濡首
吏牘俱所不曉賦此贈之

我昔偕若翁共醉燕山月寒飛雙疾羽驚風散倉卒回
首秋色中白雲陶余悅半刺足翱翔誰能念汨沒落日
瑯琊臺蕭然映華髮豈伊尊鱸興不從步兵發識爾汗
血時英聲動長安十年偶一見握手罄所歡蓬蒿仲蔚
地山水伯牙彈天墮五色霞赤城僊人餐吾子忽啖之
齒頰俱清寒太湖水淺深要我弄魚竿昨夜腐鼠過鸛

雖了不看仲尼畏後生余亦慚先爾母作一丘觀丈夫
志弧矢大鵬戢兩翼黃雀不知止寄聲招若翁早訪雲
壑裏子其息南溟九萬從此始

邵子攜同年袁魯望詩來乞贈尊甫守中先生之
作輒嗣響焉

凌晨叩門者翩翩一佳士鬚眉映初日清波溢其齒為
余語若翁少頗習名理種瓜東陵陌賣藥吳趨里迨乎
耳順年遂三丈夫子子既饒青衿翁乃傲黃綺憶昨上

壽時臺使致筐篚門有守令轍足無公庭趾上客陳珠
璣錯落照翁几袁羊古遺狂其言當不靡顧余亦有作
要為後期耳早晚春花開醉翁三荆底

與松上人

昔我遊叢林頗與耆宿伍彈指百千偈縱橫藏中語自
謂得寶珠有取無不與今來謁松師一語不得吐乃至
欲吐時忍然汗如雨回首青天空荊棘皆淨土持此擬
叩師恐師竟無許

讀汪襄陽作顧季狂詩叙有感

昔我遊燕山宗李中所私高歌命白雪片片縱橫垂醉
醒華陽館坐見青天危狂語兩相厄寧容世人知顧生
業遊者一再侍酒巵風吹浮雲散信意南北馳契濶幾
十年聞頗豪於詩矯矯汪襄陽握手惠前綏謂余舊有
贈廸功乃其師左袒在中原江左良見嗤自余遘家禍
戢身一茅茨名姓落人間誰當齒頰之寄語謝襄陽勿
令豪傑窺吳門饒俊彥詩卷日追隨莫言秦越人為秦

作兒醫

案頭蘇詩一編偶展讀之有云龍鍾三十九勞生
已強半歲暮日斜時還為昔人歎公倅餘杭日作
蓋取白樂天語興感也此公尚為搖落語吾輩寧
無窮途之慟因成一章兼示舍弟雖然公兄弟名
位穹顯晚節各天而吾以早廢棄故相守田畝間
差為優耳他固不敢較也

偶誦蘇公詩龍鍾三十九身猶一方佐名滿天下口伊

余射策年與公頗先後雖忝大夫列六載歸南畝人間
失意事所歷無不有多岐夢猶惴百煉心欲朽雌黃墮
齒頰雄白空知守西風傲短褐居然成野叟流年蠹書
卷殘日漁杯酒用禪文寂寞塞兌防穢嘔齋前種白楊
蕭瑟鳴虛牖顧謂吾季方吾言汝知否今古伯仲名無
出蘇公右風雲壯接翼天地老分手躑躅瘴海間能無
歎不偶萬事吾敢如一得頗無負蓼莪我固永廢棠棣幸
終友去去入吳山相攜共白首

虎丘老僧有竹林精舍文伯仁為圖之王履吉書
疏於後余遊竹林僧出示此卷履吉下世已三十
載矣為之憮然因成此詩

山僧業靜者
翛然無世氛
朝疏淇澳雨
暮浣瀟湘雲
老可湖州筆
為竹寫清芬
况有王子猷
猷英標冠人
羣自言讀書
處何可無此
君我來憩其
下流颺散餘
醺其人不
可作太息讀
遺文新粉含
幽月蒼翠鬱
紛紛截作山
陽笛淒涼安
可聞

題趙千里畫船子和尚卷後

秋江戰寒飈一葉縱橫走船子有伎倆舵柄時在手借
問自渡者還能渡人否

題募緣卷後

聞欲創招提藉衆檀越力而我貧里人翻乞常住食所
餘唯一物無價亦無色念欲施山僧覓之不可得

陸仲子為其友索題雲洲即以塞白

白雲不須山滄洲不須海所以吏隱人跡混心不改浮

沉任波色舒卷依天籟寄言采芳者杜若青猶在

王山人自稱十嶽先有二詩見寄極國士之許千里命駕曾未淹日欲留金陵長篇見貽拂衣北首聊此和贈

鳳鳥摩青天片羽飛東海却墮七尺籬鷄目熒然改驪龍領下珠夜必吐光彩綠醕驕欲鳴青燈耿相待不謂雙垂楊果繫出剡舟野夫雖稱病為汝梳白頭沈沈薜色夏忽起商飈秋特達壯士膽未許黃金酬謂予九州

外當復有九州男兒志五嶽逝將十嶽遊酒間扣所適
秦岱曾入手馬跡重雲巔鷄聲浴日後狂扣玉女盆中
原散培塿自攬烟霞色語語不離口十嶽天中外子尚
餘其九寒暑煉玉容去日各非有昔予讀損益亦復思
名山晚師維摩詰旦夕棲衡闕縱橫千界表乃在彈指
間笑攀青蓮花歸挿玉女鬟奚必策重蹀役役勞心顏
我語雖大佳聽之了無答杯酒散城烟孤帆凌超忽唯
餘留別句擲地金石發後夜倘見懷長江弄秋月

贈奕者程生

世才不可盡豪鷲爭輩出國手何縱橫令我難甲乙李
生自燕京雅與顏鮑匹飄然來江左百戰不摧一驚電
隨指生堅城望風失竭來得程郎少年美清揚所遇無
上駟雲蹄鬱騰驤及乎與李角賈勇不可當李如李將
軍部曲神飛揚程如程衛尉號令嚴秋霜為李固左袒
推程亦軍冠銅池垂楊側隱若闔楚漢程雖近巧遲往
往詣玄觀落子黃葉深收枰燭花半吾日殊有餘母乃

樵斧爛

楚臬陸子還吳

仲宣久厭楚季鷹忽悲吳掛冠北闕下散髮南山隅笑
謂武昌魚何似江東鱸余豈塵世人偶然廢耕鋤八月
涼風生白雲滿江湖但從最深處覓有王生無

題孫君竹鶴齋

緱嶺既云負夾池亦以往詎若過君齋悠然令神爽玄
颺逗幽窳白雲團虛幌瞻澳來遠姿鳴臯流清響葱蒨

承露碧嘹戾排空上匪由乘軒羨庶諧君子賞高詠遂
初篇振衣發遙想

信陽王子祖嫡過訪王子能文章談詩而不飲酒
汝潁足名士燕趙饒悲歌此地忽遇爾不醉當如何君
自銀不律我但金叵羅笑謂千秋業所得仲孰多流微
雜清商大陸揚素波明年一匹練倘訪青山蘿

周生為亡友王子館甥頗有淪落之歎愴焉念舊
為贈此詩

憶從維揚楫風塵失而舅幸餘延陵諾不墮孝標口玉
猶當日潤璞更何年剖惻愴今昔言乾坤重回首

題霞川卷

高齋傍霞嶼川光時復暝浮天自五色含颺忽千片陸
離媚初旭窈窕橫晴巘文魚欣欲上遙驚孤難辨為語
謝臨川如綺復如練

贈石給事拱辰

烈士嬰逆鱗豈在明月珠念欲醒睡龍潤澤四海枯我

逢石中郎白晳好丈夫韶年入青瑣玉樹含冰壺氣塞
指鹿臣願行斬馬誅封事八九條一一社稷謨雷霆橫
白日人鬼在須臾九關虎豹號魑魅亦擲揄一為蘭生
叱萬髮立頭顱捶摘紛下來血肉頓模糊君家鐵如意
欲碎紅珊瑚微賤何足言母乃聖德渝昨窺中興詔坐
見海宇蘇惜哉反掌間迷陽胥天衢豈不願良臣良臣
不易圖構茅漳伍傍天錫萬死軀朝與牧豎出夕歸樵
父俱貧無南山田足挂牛角書余本骨體人為君重跼

跼男兒未蓋棺各自智其愚宇宙大茫茫努力愛前驅
下彭城而南微雨即事

稍盡彭城山悠然見清淮微雨雖沾衣能令山色佳出
沒前後旌浮雲時與偕濁酒兩三行聊以佐歸懷

莫公遠移居武林

臯橋無舊業吳閶多少年白眼冷相睨青衫凋自憐以
茲掉頭去鼓楫西湖邊幸逢郝北海為營剡下椽復從
王江州乞取酒家錢朝劇靈隱雲夕卧南高烟笑指飛

來峯共汝兩寓賢失意則蓬累且誦逍遙篇

答贈張叅政欽伯

君時由諫垣
出分部金華

肯領金華省今治金華部去攜香案烟來作冰壺霧

金華

洞名

君身自僊骨世豈知其故蕭灑八詠成悠然片鴻度

汀際白蘋秋江東彩雲暮吳興差卑小馬足當君慕最
後蓬萊僊此語聞白傅

濟川篇為太醫邢先生題

在佛說法時藥王為導師太乙操蓮葉下救人陷危儒

用久寂寞其功或明醫邢子利涉才托跡在黃岐朝飲
蘇橘井夕飲長桑池江陰十萬家家春風吹餘波來
惠吳起我北堂慈傳楫吾所難清泌可樂饑彼哉問津
人愧汝濟川辭

華婿水部病起赴官

衛郎別我去玉立秋風前自無膏肓疾不待彥輔痊觀
潮壯起色策馬薊門烟金掌出層霄零露正纖圓乞取
芙蓉杯歸壽蓬萊僊大江饒白雲南望更依然我期臨

卽令春江候樓船

送沈九疇還四明

曩時四明客，惆悵能文章。
揮毫寫秋色，眼底天茫茫。
家多渥洼種，白眉矜最良。
今朝逢阮咸，果勝步兵狂。
咳唾出珠璣，半落奚錦囊。
抗手別我去，孤帆渡錢塘。
倘成郊居賦，須寄王中郎。

有上人者號景峯，意為念其師也。乃至作圖，目寓目母，乃執有乎為成數語，聊以示規。

若不破名相此圖空在卷譬如阿閃國一現不再現若
破名相盡無見無無見百億須彌峯峯峯入師眼余本
峯中人焉能觀峯面倘師為豎拂倏然已忘辨

寄題張伯子兌園

春至三河陰百卉皆悅懌主人何為者席花讀周易毋
為悶其口相與成麗澤

仲子兌池

仲氏日規池泓渟復清泚蘋末巽二風斗間天一水滙

為感山澤青山在其底

叔子兌亭

宛宛帝女雲疑出巫山岫過君草玄亭芊眠入牕牖便能呼李雅相與賞此否

偶成齒髮吟作長慶體示伯龍子念君載

髮白況乃寡齒痛行復落此事當漸來委蛻偶先覺觀電等浮榮嚼蠟如好爵馳思佐墳典策勲播寥廓其名在千古真識久冥漠先民有遺言及時當行樂稍往忽

已空未來疇能度營為醇醲腐精恐佳麗鑿怙恍出世
言渺茫長生藥成證聊自暖齊物終妄作事事能悞人
破了亦無着語罷當更愁愁來又成錯

四瑞卷為顧母題

朱明吐南極羣禎時輻輳上元捧玉觴王母前稱壽三
花復加一叢芳仍再秀何意謝庭榮翻為顧家婦

盛子時泰過訪有贈

盛子金陵來語語甘小巫能令陸平原不敢賦三都綵

筆健秋鷹錦囊壓奚奴暮尋華陽館眼醉天模糊莫逐
時名去人言多自誣

江黃二州謁白尚書蘇端明祠有感

白傳佐潯陽匡廬落其手蘇公謫宜黃游踪寄樊口物
情豈相為天意良不偶揮淚對青衫垂腰厭黃綬是時
二公年四十加八九飛騰在俄頃綸綍相先後而我同
茲歲楚憲起南畝却顧所佩章叨竊慚已久椒漿薦落
日餘瀝自為壽髻年弄筆墨老至忘其醜頗諳游戲禪

更貪聲聞酒別業婁水傍歲功良亦厚園多履道竹門
種杭堤柳功名善愚人人生好自負造物亦苦慳安能
令多取真樂隨形無虛名背身有洛下醉朱唇天南搖
白首明年定掛冠不蓄趙瑟婦以此叩二公公其默許
否

贈李方伯師孟

李君與余交好素矣庚午秋余忝晉臬君寔佐
之尋以大叅代余吳興部今年余起家楚臬過

君里為酒竟日亡何而遷廣右藩伯則君所解
之綬也然余乞休疏已前上矣感慨之餘因成
長句為贈

余昔遊太原賴君佐提刑有酒不孤賞所吐皆蘭馨北
風吹晉祠冰作涕淚零及余吳興政舊刃發新硯平陽
許畫一臨淮實精靈起家再游楚值君方錦停謬脂嶺
右轄是君所遺輶官自雪鴻跡人如大海萍吳越代兩
政晉楚若一廷生平易解官各若秋夢醒更有大奇事

我談君試聽太湖五百里中有兩洞庭洞庭八百里中
一君山青爾我長對之渙然雙客星欲造即馭風雲車
會青冥安能傍塵世蠅聚襲臃腥

幡經臺

西望幡經臺蕭條欲非故陶令呼不來謝監推不去遠
公既以遠茲意疇能悟

三笑亭有感

昔聞虎溪笑謂已契無言及覽般若願猶覺有待煩青

山不點頭白蓮腐其根淨土何必歸况乃思鴈門

答與繩太常

故人尺一來字字皆肺腑謂余老善醉醉復多泄語甚
醉解傷生泄恐終悞汝幡然指其口汝罪髮可數奈何
司出入廢職媚其主興至不我卻機發不我阻口拜前
致辭公言胡不倫趣死且百岐豈必盡飲醇不應北邙
土日日埋醉人籍令畏語泄獨酌仍杜門在耳不在舌
可掩不可捫耳聽復大笑惜官重於身何如歸去來小

酌松醪春耕釣一二翁杯斝三五巡小酌不損神小語
不汨真珍重故人札賦此等書紳

助甫稱疾以見父出訪真陽有贈

鴻冥方自歎玉立見吾子離憂小語失往事深杯起僧
彌固難兄萬年那可死努力各加餐聯翩當此始

贈不二和尚

苦無道民好披緇禮遠公勞師破吾執所破隨亦空飯
罷了無語趺坐蒼山中

贈范了髻

一瓢更一杖此外都不聞
瓢還潁水月杖付葛陂雲
揮手參山頂却笑洪崖君

為李員外悼亡

矯矯雙鴻鵠羽翼忽已分
豈不念佳匹飄然辭濁氛
君子悵獨晤嫩人曠何羣
雜珮空瑤響流蘇陳綺文
清心餘玉映麗質罷蘭薰
非乖莊生達尚挹荀令芬
徵歌惜傾國流夢為行雲
去來杳難跡盼睐恍有聞
亮無排空

馭毫素表殷勤

挽歌有序

在昔文章之士多不待年崑岡一災併命玉石
何者良以洩造化之精則真宰默仇奪人倫之
標則物情自忤繇古逮今往往齊東薤露蒿里
虛分貴賤一坏之土何所等差挽歌愴極平原
達稱彭澤然不過嘆生平之不足悼大冥之無
終而已彭澤龍蛻可謂實境平原鶴唳竟成虛

談至於文舉長寢希畢萬事靈運忍痛送心正
覺中散顧影夏侯怡色驅使大雅以豁至怖雖
稱澹度難謂脫離今戰鬪洊鬱棟焚如天柱
地維潰折至再而僕方蹈唯谷日虞觸藩若使
展轉河清從容牖下便當乘理而歸與化俱盡
復何悲哉是故預探所遇以待叵測聊為三歌
見聖賢莫度之限雖變亦常耳

丁巳歲識

昭昭天宇日倏忽墮虞淵如何盛年子光彩中棄捐白

日當再晨逝者不復還素旒紛前發迫我嚮重泉華棟
自雲浮甘此七尺棺子弟來相餞餞罷各言旋平生所
著書往往留心肝妍蚩他人口已自不得言束髮悟生
趨往復雜憂患但言身日短不覩身後先仰問巫陽師
安能為我權

其二

丈夫事四方魂魄戀故鄉今我胡為爾委命付窮荒臨
歿辭明去親知不在傍寸桐為我車腐革為我裳魑魅

為我御瘴霧為我糧螻螳司門庭青蠅來吊喪鬼伴羣
侏離與語不能詳道逢司命君示我返魂方長跪告司
命生人多患傷不願復為人但願長彷徨

其三

甲兵冠天來朝野靡宴寧背親為王臣焉以辭國殤青
霾吹蕩翳金鼓慘不揚貴賤併一時顛趾委沙塲日暮
輪蹄盡烏鳶來啄創有手不能驅有目無精光朔風吹
朝夕枯骨漸堅強家人具衣冠延我之北邙羽衛驂驪

列空為存者倡兩地竟誰真千秋浩茫茫

傷盧柟

北風摧松柏下與飛藿會詞人厄陽九盧生亦長逝桐
棺不歛脛寄殯空山寺螻蛄與烏鳶耽耽出其計酒家
惜餘負里社忻安食孤女空抱影寡妾將收淚著書盈
萬言一往恐失墜唯昔黎陽獄弱羽困毛鷲幸脫雉經
辰未滿鬼薪歲途窮百態攻變觸新語至詞場四五俠
往往走餘銳大賦少見賞小文僅易醉醉後罵坐歸還

為室人詈我昔報生札高材虛見忌自取造化餘何關
世途事嗚呼盧生晚竟無戢身地哭罷重吞聲皇天有
新意

張幼于廬墓

遙望白華山山石鬱嶙峋中有白華吟吟聲何悲辛之
子懷永懣結廬在丘園荆榛初往蹊松柏自成鄰念彼
長夜臺痛此百歲人揮淚循脩壠高慟逮蕭晨晨猿無
停和壠草不易春悲風吹北陸慘日就西翕重冥稀生

構九陌絕幽輪音容曠不接志意邈難伸朝露夕自霜
暮蘭旦為薪憎結令中耗安能延子鬢非虞仲舉謫冀
全嗣宗真弧矢庶可揚竹素將不泯

九松篇

寒色無早暮玄岡翳重陰連蜷九松樹偃蹇不成林上
有含哺鳥啄血正涔淫念欲晝哀啼彈射恐見侵存為
沒者身沒為存者心銜土塞東溟鯨波浩沉沉一彈塘
上篇再彈履霜吟我欲竟此奏絃絕多悲音

會葬故陸大吉孺

生世僅卅載旅殯二十春落日射空棺櫬宇盡為薪今
朝一抔土始得返於真少婦竟華顛交友半已陳長衢
連交鞅歌哭遞相因神氣無不之焉問踈與親

其二

遊魂久已逝歸魄從此始玉樹埋土中悵悵不能已秋
風憐空桑悲音緣誰起卮酒飯一盃寡妻代為子有友
三兩人聊與歌蒿里芳名良何益空塵世人耳

遣弔盧柟墓

昔騎紫驂翩翩遊魏都
綠醺呼明月踉蹌墮冰壺
倚醉別盧柟春草十二枯
腰間黃金魚久逐酒家胡
魏節重入手雪亦侵頭顱
盧柟化為土遺骨知在無
兩女勝才人下嫁廝養徒
中原散遺集歷落照乘珠
薄醑指焦嶢若教奪汝舖
風吹英雄淚忽與千秋徂
倘遇禰正平狂鬼晚不孤

哭王樗全茂才二首

才似習鑿齒摧殘稱半人廢同殷淵源咄咄歎踈親到
了力輸命兼之憊與貧長歌士不遇為爾重沾巾

其二

五鬼燒車船得志仍跳梁二豎畏針砭挾策走膏肓書
淫不成療筆塚聊並藏古今失意事不敢問穹蒼

悲七子篇

隆慶壬申初冬梁禮部思伯以使事訪我還南
海明年萬曆改元六月余之楚臬過吳門文博

士壽承喪歸自燕余往弔傳雲間何翰林元朗
物故尋訪陸少卿子傳以疾不能出見許太僕
元復送余閭門王茂才君載至楓橋沈山人道
禎抵金山乃別未幾得家信君載別余之次日
暴卒尋馬憲副某以元復子傳計來余遷嶺藩
還抵九江遇張生復以思伯計來馮叅議某以
道禎計來蓋四月餘而六人者次第逝併壽承
七矣夫七人者皆風雅士也後先與余遊好乃

不半歲而盡失之能令後死者無戚戚也舟中
小間每一念及輒為神盡不勝子桓鄴中之歎
遂成一章以當一慟云耳

文翁信其真履坦物不隔許老初耿介晚負長輿癖通
蔽雖互妨典刑尚可則元朗業任俠聲酒恣所適翩翩
梁公子養交不忘飾子傳青雲姿杜門事探索如何中
天謫病使心志易沈生慕落拓王子工便辟此曹富詞
源兼多善酒德年命一朝傾轉盼成陳跡奄忽鄴中論

惻愴山陽笛神往形隨
敝人生非金石逝者不須
與存者亦瞬息安能使不
悲長悲竟何益

弇州四部稿卷十五

欽定四庫全書

弇州四部稿卷十六

明 王世貞 撰

詩部

七言古體三十四首

寶刀歌

予十五時目不知詩會經師駱先生為人作寶
刀歌戲以漢字命韻予輒應曰少年醉舞洛陽

街將軍血戰黃沙漠先生大激賞謂子他日必
以詩名予謝不敏又三載舉應天薦將計偕有
鬻刀者因據舊語補之存一時故事耳不必計
其詞之工拙也

昆吾精鐵光灼爍不論風胡手中作涪江水淬明月寒
漢冶風迴赤蛟躍鋒尖七曜隱芙蓉匣裡雙環吐龍雀
少年醉舞洛陽街將軍血戰黃沙漠記取銜恩一片心
扶君直上麒麟閣

吳節婦吟

時節婦以秦氏子為後

秦家女吳家婦東風吹折連理樹霜摧樹枯凜如故吳氏子秦氏兒東風吹長寄生枝但令枝盛何足悲兒能成名孫復顯吳家鼓吹迎旌典五十餘年影語身青燈白髮不知春九泉下見夫君面猶是當時執手人

竹牕歌題同年周叔夜父卷

主人卜築松江曲數武茅齋一牕竹主人之節清且素况與此君共朝暮嬋娟感拂搖曙烟主人自為汲湘川

寒飈夜雨天籟發主人行歌互相答踈影歷歷聲珊珊
入簾翠色秀可餐主人為主君為客倦鶴閒雲各分席
主人對君一撫髭世上小草吾何知誰道新篁發平地
咫尺便有摩空勢嶰谷裁將鸞鳳音中山盡吐龍蛇氣
即看雨露天上來無數琅玕次第栽主人不樂何為哉
袁履善惠芡實作雞珠兒歌遺我走筆謝之

袁君贈我雞珠兒為我更作雞珠歌使我應接不能暇
欲讀廢食且奈何問余舊遊吳水隈菱芡貼水參差開

吳中女兒嬌可愛採得雞珠和菱賣當時鮮髮林間卧
頃刻便啖三千顆丹筐初傾厯落圓玉肌乍剥溫柔露
芳腴滿中更可人坐令蓮的無精神煮石太硬苦費齒
雞珠自是真僊餌一朝失足辭漁磯可憐方朔長苦饑
明朝神武掛冠去知余不為尊絲歸

華員外改南司馬部分韻

華君自返蘇門嘯垂白公車待明詔司農權稅力不任
願得閒曹寄漁釣朝遊采石訪李白夕向金陵歌謝眺

長安冠蓋者誰子珥玉紆朱互矜耀龍領欲結千歲穴
青春已隨東去曜鷄雛高逝腐鼠嚇鷦鷯卑棲黃鵠笑
君家學士亦如此碧山焚魚尚年少

征西將軍行

征西將軍者大同帥周君也客從北方來談周
君填撫事甚詳甚喜而賦之

征西鐵冠雙縵胡結髮百戰當匈奴虎頭自是萬里相
猿臂能輕三石弧七更帥印控屬國再踏王庭擒骨都

白頭據鞍偏矍鑠赤膽懸胸何卓犖西河太守血吮瘡
護羌校尉躬持藥負土親填光祿塞絕甘不作嫖姚幕
清秋候氣度刁斗中夜籌沙坐鈴閣傳烽一點若星流
便鑿函門上臂鞬個個健兒擐越練家家少婦礪吳鉤
爭道鴻毛等微命共祈龍額早封侯橫行要赭天山色
獨立能高紫塞秋由來壯士矜才氣恥學低眉事文吏
兒女俱能道顏色公卿不見通名字萬死常懷馬革心
一歸羞作菟裘計天子臨軒總第功賦詩談檄盡豪雄

誰更封侯并拜相
李蔡為人在下中

壽寧侯故第歌

誰家甲第橫道周
路人齊指壽寧侯
空餘榮戟連雲暗
不見軒車學水流
卧壁蠟蛸間向暮
當門烏雀亂先秋
道傍老翁眠不起
自謂能言壽寧事
貂珥那傳就日功
椒房已挾薰天勢
當年兄弟同侍直
白馬前後黃金勒
天子宮中賜歡笑
五侯門外看顏色
有時日晡復召宴
龍鎖東華歸不得
禿袖黃衫倚醉逃
別院春風墜香幘

鄧山橫壓蜀雲低郭穴偏承漢露滋去奪冠軍沁水里
鑿成安樂定昆池初來後厠渾疑錯乍入危樓意欲迷
三尺珊瑚鬬如意千金蹀躞射彈碁歌屏掩翠鏡窺紅
粧粉圍春肉陣風急管繁絃開永巷朱簾高棟勝離宮
石家富貴乾坤小霍氏功名旦夕空可憐世路同轉轂
君恩覆水難再復西第千甍不足居東門尺土翻相逐
隴頭寒食麥飯青若敖無人餒鬼哭君不見羊腸峻阪
危挿空後車肯問前車覆

自從行送子賢兄判武定

自從書生好官職萬事都道書生力朱幡皂蓋者誰子
滿目瘡痍救不得我兄昔作東平日却罷逢迎勸耕織
間黨豪宗伺嚙笑郡國守相低顏色枳棘誰為鳳凰歎
鵷雛頗遭老鷗嚇歸去旅葵堂上多種將菰米湖田瘠
去年汝出東平道父老初驚漸相識爭獻濁酒肥雞猪
為言童稚今有室棠樹已見堪把抱汝髮何由尚如漆
武定風土亦不惡臨別殷勤愴今昔男兒光彩逐手生

將相功名到頭識君不見漢家循吏黃潁川亦要承塵
出三百

苦旱歌

君不見歲已在酉魃為虐五月黃塵恣飄瞥農家兒女
竊愁歎轆轤殷殷夜不絕原草新疑野火燒山田久作
十字裂我欲伸眉向誰說東南轉漕匱奔送西北軍聲
尚瀕洞桑林不聞六事禱柏梁已上乾封頌陰雲油油
乍東至遠近懽呼聲動地惡風忽從雲際起頃刻蕩散

歸天意青袍皂帶者何事中夜不眠坐待旦三星在空
月爛爛偶思東海亦可憐一婦橫死枯三年京師賞罰
未足筭李斯痛哭咸陽之市邊

吳郎行贈吳判官轉浙藩都事

吳郎醉罵金陵席騎馬却赴通州謫三載黯淡風塵深
始作江南幕中客吳郎護落偃蹇且莫論爾是文定尚
書孫書生不及文定世父老猶傳孝皇事洛陽長沙初
拜相華容浮梁互相讓九重握手賜顏色萬里君門若

咫尺是時文定稱近臣深謀密語上所親朝集鳳池間
委珮即看魚水更何人由來大厦須梁棟不獨文章為
世重鼎湖忽攀龍馭髯寰海但使蒼生慟只今相去四
十載萬事那期一朝改玉几沈深北極尊金魚寂寞青
雲在嗚呼往事生新愁我歌吳郎雙淚流聞道君王思
故劍莫令衫袖濕江州

森檜堂歌

結茆近城市不聞車馬聲一登丘公堂恍然遺世情堂

中何所見金石一千卷堂前何所植老檜參天三百尺
根出太古垂青銅霜皮剝鑿金芙蓉長空冥冥挂雲霧
白日隱隱撐虬龍秋陰障大暑春色凌窮冬秦皇若見
之泰山不得封羅蓋團晴怪枝偃少室嵩壇道非遠樹
杪遙飛瑟瑟泉望中高映層層巘摩娑此檜公所栽天
與一氣長崔嵬人間但看長年歲卑枝亦是清廟材我
聞闕里二千載祝融橫來復安在虞山七星亦近古何
處老翁更作主那得此檜還此堂森然並蠹公之鄉道

傍過者詫相指千林喬木摧昂藏為公作歌重歎息丈夫立身須正直君不見丘家堂前一老檜扶持尚有神明力

張將軍歌

張將軍虬髯鐵面勇絕倫雙臂直上見賊嗔左騰右蹕七尺身倏忽飛動威天神方印縛肘金麒麟是時六月軍聲變風塵蔽天不相見雲中健兒面如土妻女倉皇淚飄霰將軍獨提其麾下意氣不數天山箭闕頭老弱

數百騎酣呼赴軀逞一戰捉生擒獲偏裨任胡乃區區
好趣便角聲忽從敵中出殺氣天昏縱騰越弓刀蹙沸
震風雨戈甲光芒耀日月將軍大叫鼓聲絕吏士空拳
奮白骨骨都當戶稍欲遁中原賊臣教奔突漢兵如山
自堅壁回看從校星迸逸頃刻血肉俱零亂將軍頭顱
辨不得敵騎叩鞍咋指歡喜劇狼頭羽燾掃太白陰飈
浙瑟燐火明落日慘澹鳥獸匿男兒要在屍裹革人生
百歲須有極雲中帥者誰其儔十年之間梁與周親披

荊棘開軍府躬起瘡痍敗敵謀畢萬雖能老牖下李廣
終然望徹侯將軍繼之亦不惡可憐鳥墓終荒丘嗚呼
北山石櫛東園器肥酒大肉同千秋

題剡溪障子

晉有王子猷風流掩前輩高屐郗公門拄笏馬曹歲歸
來百事稀種竹凡幾圍貪看鏡湖白坐失青山輝風吹
大空雪片片鏡中飛千巖鳥雀凍不喧田父墜戶鑪頭
眠孤棹蒼烟放歌去故人應在剡溪邊人間戴生寧易

得其若歸心浩還發空林無枝玉凌亂獨破寒流載明
月相逢稚子候荆扉東方漸高跡已微偶然適意差足
快千載何人勞是非誰為強被丹青色令予欲訪山陰
宅荻花茫茫不知路中夜披圖興蕭瑟

送趙員外行邊歌

烽火夜照甘泉赤萬馬南來踏秋色漢家推轂三將軍
幕府羽書尚充斥塞內屯營稱戊己兵前擊柝連朝夕
射鳥小兒拜期門牧羊賈人助田宅紛紛爭覩獻前籌

寂寂誰同天子憂朝貴俱投驃騎里書生多著鷁鷁裘
學得量沙任轉餉能言畫地便封侯趙君自是關西俠
平生報恩身似葉倚馬逡巡草檄文論兵慷慨彈長鋏
已令野史傳循良復要雲臺策勛業須臾持節按榆關
金城形勢奏書還受降橫奪單于膽長樂全迴聖主顏
不學蒙恬絕地脉誓同飛將定天山饒歌倘俯長城窟
哀吹綠霜夜中發東都甲第金滿闥京觀何人辨枯骨

俠客篇

七國養士何紛紛誰其雄者信陵君擊柝雍容據上座
鼓刀慷慨却秦軍其外碌碌諸公子借日迴春互爭綺
列鼎常食三千人俱簪珊瑚躡珠履就中脫穎君不見
一片雄心為誰死燕丹恨秦貫白日易水東流羽聲疾
倚柱倨罵大事去惜哉不講刺劍術金丸馬肝亦何益
田光先生太倉卒咸陽擊筑變清調碧血殷霜染秋草
明月還輝博浪沙滄波豈沒齊王島五陵射獵倚醉歸
睚眦殺人無是非髡奴赫奕拜卿相天子威權下布衣

黃金塢當中路走馬過之不肯顧五花騮狐白裘輕薄
少年非我儔四座酒莫傾請聽俠客行海內萬事何言
平袖中吳鉤霜雪明出門一笑失所向十日大索長安
城

賦得養龍池送莫膳部視貴州學

我聞貴竹羅施異西極兩山夾陂深莫測神物蜿蜒走
其上頃刻下降房星赤蜀王內廐五千匹雲錦叢中逞
顏色遙將萬里白玉墀奚官執鞚不敢騎囊沙覆壓三

百日辛苦風雲國士知麟鬣染汗珠
絳驚秋霜漬沫桃花明郊塵不動
落日緩六飛恍若空中行從此峯名號
騰越詔圖真跡留神闕濠陽貴人凡幾人
雲閣勲名齊日月只今一百八十載
高岩大澤依然在房星不明五星聚
學士青衿盛文彩何當塞徼多馳驅
君王按圖空踟躕黃金築臺買死骨
騏驎碌碌悲鹽車君不見養龍坑旁
雲氣薄咸陽苜蓿橫秋漠長鳴發跡
自有時誰其馭者今伯樂

謝生歌七夕送脫屣老人謝榛

長安送別今七夕北斗卓地銀河昊此時痛飲不快意
青衣行酒無顏色嗚嗚擊筑為秦聲和以短缺霜縱橫
大白入手葡萄驚慷慨為爾歌平生謝生長河朔奇筆
破萬卷日月縱游翺乾坤任偃蹇開元以來八百載少
陵諸公竟安在精爽雖然付元氣骨格已見沉滄海先
朝北地復信陽一柱不障東瀾狂人握隋珠戶和璧及
吐中夜無精光謝家一甌椒漿水晨興自薦開元鬼俯

仰寧教俗子罵聲名肯傍豪賢起妻孥生計環向愁掉
頭且吟五嶽遊青春斷不淹富貴白眼何以干公侯趙
王自是平原君玳簪珠履三千人生衣短衣巾角巾握
管從容踞上賓從此王名賢好士濁漳往往成清醴座
中誰出夷門右海內願為公子死生豈不戀王家濡齷
齷忍為轅下駒仰天大笑失所向忽復束書來帝都帝
都雲霓接九衢委巷獨滿羣公車劇談麈尾擊唾壺囊
中欲探一錢無其時盧楠下濬獄白雪無功白雲辱九

歌草就人不知生也手持向人讀讀之未竟淚簌簌清
霜倒飛鬼神哭繡衣使者從天來幽谷煖吹鄒律灰懽
聲欲動黃金臺朝為俘囚夕貴客生言於柙何有哉憶
初識爾崔都尉何人不懼回天勢謔浪時存爾汝交酒
盞肯及縣官事乃知豪傑無不可嬰兒世態狎乳虎片
語能令萬象歸雄心直向千秋吐生今去余向何所生
不在天之上地之下前不值古人後不值來者縱無長
繩係汝足安能一揖輕相舍為言聚散等流萍貫月查

來可暫停明年牛女橋成夜指點依稀見客星

贈通帥袁君正

憶昨匈奴十萬騎連烽上燭甘泉紅穹廬韋韞蔽原野
殷殷鼓角驅豐霽老人伏頸刃洗血少女椎結騎花驄
豈無棘門諸將士噤手欲墮烏號弓是時兵機戒頃刻
天子晝坐明光宮教倉積粟數百萬不救齎敵何怱怱
相言主臣幸無恙蠟書直入回重瞳節符三發旌守土
益以副帥今袁公袁也手提一長劍燦如白雪凌崆峒

恩收健兒共肝膽氣奪萬衆無英雄旄頭凝冰代馬盡
太白八月秦關通將軍按甲息餘勇轅門大旗橫朔風
投壺雅歌太平事衽草嘗膽將無同野人倘憶城下辱
太史猶聞書土木揮鞭直踏燕然山一洗穹碑為余讀

歌行長短三首贈梁公實謝病歸

公實汝胡遽為別郊原黯淡無顏色未論咫尺即萬里
鴻飛冥森塞雲側南看舟楫北冠蓋落日滔滔豈終極
乾坤去住亦何限丈夫豈盡關胸臆邇者吾醉長安陌

忽醒雙眼文章伯雄心頗折歷下生俠志兼許淮南客
徐卿慷慨見同調每語富貴真堪擲酒酣吾歌獨能楚
掀髯一笑秋天白亡何汝稱抱奇疾躑躅下羨夷門卒
裁成芟衣僅掩脰欲向空山採芝朮嗚呼日月知汝留
不得縮地迴顏竟何術千年好振在吾黨萬事可足嬰
公實

其二

南海明珠久寥寂貢來光彩傾都國漢宮照乘豈不賞

汝抱欲重江湖色江湖秋寒毒龍卧至寶乃得還其故
冥冥青天走日月森森巨窟生烟霧長安郎中按劍誰
龜茲賈人泣相慕

其三

汝謀結室羅浮頂下飲僊人葛洪井桂樹宛宛山日深
松花濛濛白雲冷我亦僅買蜻蜓舟歸與少年為薄遊
采蓮一曲杳然去得醉即卧清溪頭

醉中漫歌

貴亦一丈夫賤亦一丈夫昔脫短裘付酒壚人人喚我
高陽徒有時醉獵南山下倒騎蕭家生禿駒人間萬事
無不作唯不能作平津客竭來十載遊燕市眼中茫茫
盡堪白黃金縱積如丘陵何可枉沒長安城且為盡買
中山酒卧看悠悠世上名

擊鹿行

匕首不肯避君鹿一擊波紅寫盤玉乍如錯落摧珊瑚
下泛碧海之醺醖伊尼右手大白左兩者並是神仙祿

已堪桓陸片時歡未煩楚漢諸公逐此生分絕安期駕不
死反並嵇康戮王子欲罷仍踟躕忽憶少年諸獵徒驂騑
蹶起匹練色日落不落雲模糊翻然草際出此物銀牌隱
項垂流蘇少年拓弓霹靂響鹿也宛轉無前途霞絲雪縷
袒分割一飽盡付黃公鑪凋零俠氣久已甚忽復邁此萬事
無徐君徐君且莫歌丈夫失據當如何橋林豐草世無限
苦復擾擾趨田禾寧為披裘酌澗水鹿門山色青嵯峨不
然老作長安客豈異爾鹿嬰其羅嗚呼豈異爾鹿嬰其羅

別子與

江左吾與徐中行相逢一言心遂傾蓬累世事豈足齒
所不醅然千載名吾其陰崖振孤木子獨陽野敷羣英
聲華落落敢伯仲肝膽炯炯無平生憶為子昔歌擊鹿
豪氣盡壓長安城琥珀下墜鸞刀紫葡萄寒摧大白明
長歌自令浮雲合雙眼忽向高空橫驚枝一羽破秋色
萬象頽首隨南征荆軻曼聲漸離筑易水凝流如欲鳴
故鄉鱸魚無不有擊鮮者誰人得否眼前豪傑難稱意

君不見徐卿尚逐衣冠走

太原侯歌

元末閩寇起福寧守王公某暨其子力戰死之
妻亦以不辱死

海雲壓山晝驅颶時危甲兵滿天地兒女走啼城不開
太原將軍怒裂帛旌旗無光鼓聲死空拳欲呼奮難起
如林白刃凌秋霜茫茫四海一父子閨中婉麗人共惜
肯以蛾眉事讐敵夜光迸裂臙脂紅閩山草樹增顏色

豈無冠蓋諸商胡炊金切玉烹醢酥開門夜半走大漠
得不枉殺稱丈夫嗚呼得不枉殺稱丈夫

送周一之從大將軍出塞

去年攬搶掃幽薊千村萬落無完郭漢家長技五不一
邊沙獵獵吹神都甘泉天子赫威怒手授大將雙雕弧
幕下黃金三十萬紛紛俠兒辭酒壚强弩射波裂鮫兕
長劍斫石驚於菟靜如凝冰日慘淡動若迅鵲天糝糊
誰其短裘誇揖客緩頰轅門奏奇策握管能書竇憲碑

據鞍解草陳琳檄時從鈴閣借前籌或向平津抗賓席
俠兒豈無好身手出門低頭候顏色兵起不定公侯相
時來也着書生力今年太白秋入月單于祭旗狼頭折
粟馬青嘶蒲類烟洗刀赤染渾邪血驅軍更奪燕支山
從此婦女愁無顏歸來天子賜湯沐笑擁如花金市間

昌平侯鐵券歌

英皇昔日困魚服慘淡四廟精靈哭乾坤膏血付邊馬
烏鵲晝向行人啄于公石帥獨當柄指顧號令無翻覆

天下勤王頗不少楊侯上谷能神速鳴鞭遊騎出飛狐
咋指單于遁涿鹿候氣已見平吞敵左右弧矢垂雙箠
居庸關頭落日黃饑卒盡飽降人肉新皇論功獨召宴
劍履醉向明光宿貂蟬換出驚妻子犀玉手授稱腰腹
當時報功恨不極促製鐵券黃金飾無論此券一尺鐵
帶礪河山開社稷百年倏忽豈更遠里門不朱挿荆棘
洛下唯聞許史封邊陲尚指楊王力即看鐵券黑似漆
金書黯黯無顏色豈唯金書無顏色侯家子孫看不識

為道己巳年間事始復吞聲淚填臆昨者薊門火橫連
甘泉北捷書未必當賊鋒血戰還應長見抑尚方之券
陳如山男兒赤手那可得君不見濠梁勲舊奚足數墳
墓秋霜竄鼯鼠于公喪元石帥族風塵久賴成心膺

送徐汝思郎中使蜀慮因兼悉鄙志

長安二月百花明花間好鳥嚶其鳴騎馬低回問所適
眼中何人一李生李生為予賦白雪擊節高歌唾壺缺
兩心炯炯中自知至賞豈得逢人說誰其之子清而揚

撫琴不彈絃意長高山流水偶自會浮雲落日那能忘
從此論詩更吾子予也開襟薦蘭芷沉鈎溟渤紅珊瑚
明月波光夜深起文章陸沉世所賤千年得失人不見
其若天涯生咫尺陌頭飛英亂飄霰青絲鸛鸛桃葉馬
徐卿持節稱使者傾城冠蓋走相送衆中無言淚盈把
漢天西盡有光輝詔許推環國士知隴雲馬首三千折
棧道猿聲十二時峨眉山深白日照錦官溪冷東風吹
巴人誦檄輸寶布夷女迎船歌竹枝灩澦秋沉疾如矢

白帝江陵七百里錦袍鬼坐映江水徐卿丈夫當爾爾
豈無故人王與李足跡淒涼金馬門烽烟慷慨銅駝里
古人恒悲生別離灞橋水東不復西朱顏鬢鬢有時易
蕙質蘭芬應未攜對君長揖藏吳鉤鵬鵠膏濕寒芒愁
它日延津倘相遇三星斗間銀河流

贈李伯承之新喻令

平生寡所識識君恨不早到處誦新詩山東李白好豈
無長安一席地令汝却向青門道道傍車馬何喧闐我

欲試奏鍾期絃柔絲弱指凍不發玉軫金徽空自憐掩
淚持將贈君子相隨錦囊行萬里吟龍高調結冰霜別
鶴孤懷寄山水宓子風流竟惘然遙傳清響下吳天期
君一鼓南薰什莫咏琵琶江上篇

壽申封君歌題青鳥圖

君不見申公七尺虬髯蒼雙目稜稜紫石光賦成不肯
獻天子大笑拂衣歸故鄉生駒挽弓三石強妙舞劍器
黃金裝解言報恩公子里亦曾結客少年場懷中藍田

雙白璧但令心知輕一擲歸來叩牀忽絕倒綠酒新熟
琥珀色何言中路多齟齬閉戶談玄學冲舉石室時窺
龍虎文洪崖亦送烟霞醕鄴河之旁春卜居三花琪樹
鬱庭閤忽聞青鳥瑤池使銜得長安天子書囊中豈無
羽化藥相期且盡人間樂玳筵急管醉莫辭遲爾三山
駕鸞鶴

燕山雪後歌

蓟門十月玄風起吹塵夜合滹沱水似蜩還應縮馬毛

先車竟復紛狐趾歲暮天涯已足愁何當雨雪重淹留
沾裘起粟聲頻禁龜手垂鞭凍不收慄慄危橋氷柱折
遙遙孤戍銅龍咽江頭已斷河伯書海上能凋使臣節
薊門道旁烟火微薊門城中有光輝流蘇鳳暖胡姬館
韎韐貂輕公子衣百盞深巡渾不醉千場縱獵未言歸
復有董仇持漢權邀迎戚里罄交歡解以重幃違晝夜
能將炙手變炎寒此時誰惜空門卧此際誰歌行路難
雨雪偏摧薊門客丈夫為厭偏側不見臨河征戍兒

暮枕琬戈照霜色

祝京兆法書歌

吳興公子二百載，尺素往往流雲霞。
仲溫急就散隸色，骨格雖爾風神賒。
狂鬼鴟張學士腕，東海小兒竟塗鴉。
鳳池綵筆難再問，雞林高價徒相誇。
人間不識祝京兆，何處還逢書大家。
此君自稱枝指翁，指間蠕蠕出天工。
寒花夜發白兔鋒，誰其贈者索與鍾。
少年臨池亦已精，晚節自喜愈縱橫。
當其得意縑素表，一掃萬古開精靈。

人云顛旭亦爾爾母乃大令更其名恍如青天磬飛瀑
崖翻石走風雷驚皂雕秋迴擊羽墜綠耳電攝排空行
蘭筋劒距時橫出逸態雄姿隨手生邇來家雞輕野鶩
却向真書大矜束即看京兆更道絕小繭遊絲染明玉
離離落日施荒草淡淡疎烟罨寒竹隣女捧心但益醜
世人貴耳翻見辱玉樹長埋呼不起儕輩聲名眼前死
處處黃金購遺跡東家覆瓿三尺紙自古文章亦如此
今昔行送袁荊州丈

十載之前頗能憶與子跌宕長安陌人間快事無不有
一醉兩見東方白我歌若舞各自愛日居月諸非所惜
邊塵一夜動薊門漢殿三秋問軍檄趨曹自是小臣分
扼腕豈仗書生力陳卿已賦蜀道難吾亦思從季鷹策
事往那能計容鬢時來且辦生毛翮只今子作荊州守
列牙橫纛驅前後荊州小兒騎竹馬吏人花間互奔走
遊刃理解萬事無抱牘絲棼片言剖十日不治一日盡
獄市豈足妨杯酒雄風晝接夢澤長壯氣濤連峽江吼

都門把鞭話今昔紅塵萋萋迷萬楊柳子若秋登落帽臺
座上得少王生否

夕夢數惡賦此自解

湘簾碧梧秋一葉匡牀夜夜迷蝴蝶六候何煩辨吉凶
五衰未必根綠業由來蕉鹿妄紛綸尹氏那能勝役人
隴上行車隴下骨君看此夢定誰真

弇州四部稿卷十六